



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Qatar PM-i yimjung bushia
Tehran semdangtsü

Karolina aser Jakub nati US Open
tarep temeyoktep asaya kokogo



VOL. XXIII ISSUE NO. 316 (ADOK 316) DIMAPUR ROGONÜ (FRIDAY) LUROI (AUGUST) 28, 2026

₹ 5.00

CM Rio-i Manipur azüdokshi aitsü

Dimapur, Luroi/August 27 (TYO): Brehostibarnü Nagaland Chief Minister Neiphiu Rio-i Manipur nung azüdokshi manenba aitsü aser civilian tem takum samaba, yiruba aser nüburttem samaba atema tebilemtsü akaba lemsatepa liasü. Social media X nung Rio-i iba ama mapa inyaker nem tapet temerenshi agütsütsüla aser

azüdokshi anentsüla, ta ashi.

"Azüdokshi tembangtsüla aser ajak atema yimjung aser security alitsüla," ta pai ashi.

Brehostibarnü Kangpokpi district nung mita atar Naga nung pongu tepsetba aser ano kar yirutsüba densema Manipur nung azüdokshi lendong tasen atalokba mapang ka nung Rio-i iba sangdong ya agüja liasü.

Dimapur Police-i mapa tajung inyakogo: DAYO

Dimapur, Luroi/August 27 (TYO): Dimapur Police-i kanga jeret-pereta aser yakyaka Marwari Patti, Dimapur nung warehouse ka meita oa codeine amshia yanglu südi ta temulung melemi aliba aket mozü bottles 19,760 apuba atema Dimapur Ao Youth Organisation (DAYO) tenüng sanga sangdong ka agütsüogo.

Item mozü apuba ajanga asen aliba tesem nung ozüing alema pharmaceutical mozü aser tanga temesepba oset prokshiba tebilemtsü tali akumba sayur. Iba ama mozü aika apuba ya tebilemtsü tulu lir aser ozüing alema temesepba mozü ayokba nung dena alirtem dak maneni tenük yoktsü nüngdakba sayur, ta DAYO-iashi.

Dimapur ya ozüing alema temesepba mozü aser tanga temesepba mozü tem ayokdak mesüra taru-tao nung anenzükdak tesem ka ama amshiba khukhua aitsür.

Temesepba mozü amshiba ajanga timtem agütsüba ya ulura lir, aser kija dak kisüing kongshir masü saka kibongtem, lanurtem aser nüburttem dak kongshir. Shishilempaba nung tajangzük

kecha agia asen lanur taküm aser tarutsü asen lanu putu lendongi yoktsüba atema temeten magütsütetsü, ta ashi.

Kasa mapang Dimapur Police inyakyim pela agizüker aser department dang maneni iba ama itdangiterba nung ajemdaker operations agia ozüing alema alizükba, rizünga ayuba, belenba aser alemba nung dena aliba nisung ajak nem ozüing agi melaba ama tapet temerenshi agütsütsü ayongzüker.

Maneni nüburttem dang saksalema alitsü aser ozüing amshirtem den teka amteper temesepba mozü dak sendakba inyaksangshi indang osang tejanga metetdaksütsü ayongzüker, ta DAYO ajanga ashi.

Police kisüing temesepba mozü maziüktetsü, aser yangji sorkar, ozüing amshirtem, civil society organizati on, nüburttem külemi inyaksü mapa lir.

Dimapur Police-i mapang shidak nung mera agiba atema ano maneni tenüingsang agütsür aser Dimapur aser Nagaland nung ozüing alema temesepba mozü shibelener nem tatok magütsütsü ayongzüker, ta DAYO sangdong ajangasa ashi.

Kohima nung yimtsüing asem nung ASF pokteta lir

Dimapur, Luroi/August 27 (TYO): Office of the Chief Veterinary Officer, Department of Animal Husbandry and Veterinary Services nungi positive laboratory test reports agütsüba sülen Kohima district kübok Kiruphema Bawe, Chiechama aser Nerhema yimtsüingtem nung African Swine Fever (ASF) tashidak aliba jangjatetogo.

Iba tashidak pokteta aliba mechi Deputy Commissioner, Kohima, B. Henok Buchem, NCS-i iba tashidak pokteta aliba tesem nungi kilometer ka telongzük ya Infected Zone aser kilometer ter telongzük ya Surveillance Zone ta sangdongogo.

Tang nungi tenzüka item tesemtem nungi ak takum, ak shi aser ak shi agi yangluba oset tem bener aotsü mesüra item tesemi bener aotsü memelar, ta DC Kohima ajanga metetdaksü. Paisa item tesem nung ak shi ayokba aser ak ayokba dokan tem shibangtsü totuyuba

agütsüogo.

Ak metsürtem dang nisung shinga marudaksütsü, anogoshi ak metsüba tesem nung mesen tepsetba mozü amshitsü aser yimya balaka nung ak shirangba mesüra asüba lira itangjisa Department of Animal Husbandry and Veterinary Services nem osang agütsütsüla, ta ashi.

Temulung melemeti ak asüba lira, itemjia department nem metetdaksütsüla.

DC Kohima ajangasa ak tasü tem official protocols nung aliba ama arentsü, ayong mesüra tesem teladak nung ak tasü mindoktsü metetdaksüogo.

Pai nüburttem dang saksalema alitsü aser mejangjaba tesem nungi bener aruba ak shi malitsü mesüra machitsü ayongzükogo.

Item totuyuba nung aibelener nem Prevention and Control of Infectious and Contagious Diseases in Animals Act, 2009 aser tanga tapet ozüing kübok mela aliba ama merenshitsü, ta Deputy Commissioner ajangasa ashi.

Nagaland nungi Nagal ak national register nung züluokogo



Nagaland nung metsüba Nagal ak, koba dang Nagaland Large Black ta ajar, iba ak ya ICAR-National Bureau of Animal Genetic Resources (NBAGR), Karnal ajanga 'distinct indigenous pig breed' ka lir ta national register nung züluokogo.

Dimapur, Luroi/August 27 (TYO): Nagaland nung anguba ak tabu ka India indang national livestock register nung tenüng züluoka state asoshi 'officially recognised indigenous animal breed' asem jungogo.

Nagal ak, koba dang Nagaland Large Black ta ajar, iba ya ICAR-National Bureau of Animal Genetic Resources (NBAGR), Karnal ajanga 'distinct indigenous pig breed' ka lir ta züluokogo, ta Brehostibarnü Department of Animal Husbandry & Veterinary Services, Government of Nagaland sangdong ka ajanga ashi.

Iba ya ajanga Nagaland nungi nationally recognised indigenour livestock breeds asem akumer. Kasa jenjang nung Tenyi Vo aka ser Nagami Mithun züluoka lir.

Nagal ak indang scientific characterization ya Dr. Dinesh Kumar Yadav, Principal Scientist,

ICAR-NBAGR-i anir multidisciplinary team kati inyak aser Dr. Mahak Singh, Dr. Mahesh Dige, Dr. Hiabe Zeliang aser Dr. H Kalita nungeri yaritepa liasü.

Parnoki study asüba mapang ak tetsü tain temang tuozyük seret 101.3 (average) aser tebong tuozyük seret 117.2 (average) tashi akumer ta jangjatet. Iba ak jang yagi tensa tamajung nunga liteter aser 'low-input production systems' nunga mesüi alir ta ashir.

Iba ak jang ta Nagaland nung akhi alemli mapang nungi aluyimba, chiyongtsü den kanga junga sendaktepa lir aser ak metsür temi küm aika kumzüka metsüa arur.

Iba ak jang indang yimyatem aser tarutsü nung renloka aotsü indang "Monograph on Nagal Pig" ta sür document ka tawa Haryana nung aliba ICAR-NBAGR, Karnal ajanga zülua

liasü.

Iba monograph ya Director General, ICAR aser Deputy Director General (Animal Science), ICAR ajanga institute nung scientist tem adenshiba sentong ka nung saya.

ICAR-NBAGR, ICAR Research Complex for NEH Region, Nagaland Centre, Department of Animal Husbandry & Veterinary Services (AH&VS), Nagaland sorkar aser state nung ak metsürtem lungjemer inyakba ajanga registration ya agiteta liasü.

National registration agitetba ajanga Nagal ak nem maitsü agütsür aser wazüka ayuba, genetic improvement aser timba metsütsü asoshi teyari angutsü.

Iba den Nagal Pork atema Geographical Indication (GI) certification bushitsüa teimla lir, ta sangdong ajanga ashi.

Kangpokpi lendong nung asür 5 jungogo; Senapati mokdang

Imphal, Luroi/August 27 (Agencies): Manipur nung Kangpokpi district kübok Imphal-Tamenglong (IT) Road nung August 27 nü telungpur temi amakba nung asür nisung pongu kumogo. Iba lendong nung kanga sashia yirur alir ka mozü kidangi anir aoba mapang asü.

Iba lendong ya Kuki telungpuri inyak ta aitsür aser Makui Ashang aser Thanamba Naga tsüingta Naga nunger civilian tem senzüa alidak tenük yoker amak.

Iba lendong atalokba sülen Naga People's Organisation (NPO) ajanga Manipur kübok Senapati district headquarters nung dokan tem, commercial enterprises aser business establishment ajunga tang nungi shibanger ta sangdongogo.

Ibai par kin züngsem dak tenük yoker tepsetba anema longkak aita mokdang alitsü, ta NPO-i ashir.

Iba mokdang ajanga district headquarters nung shishilempaba maparen kecha meinyakteti kumogo.

Kangpokpi district nung May 13 nü azüdokshiba sülen Liangmai Naga civilians trok pua bener oa tepseter anogo 106 lir Brehostibarnü iba lendong ya atalok.

Naga nunger tejangja lenir, Manipur Deputy Chief Minister Losii Dikho-ia iba azüdokshi aitsüogo.

Pai iba lendong ya tazü mapa aser shisa makartem mapa lir aser ibai nüburttem security aser akhum anema tashiyim mapa inyakba lir ta ashi.

"Iba ama shisa maka azüdokshi nung tai maket takum samaba shia arok mulungsentsü nung zülu tulu kettsür," ta Deputy CM Dikho-i ashi.

Tai maket civilian dak asaa tenük

yokba ya kangadang tai aser kecha ozüing, mulungsentsü mesüra political framework agi mededentsütsü, ta pai ashi. Iba ama maparen yagi Manipur nung akhi ama tensa dangi arutsü meranga inyakba nung yimtem agütsür, ta Dikho-isa ashi.

Iba azüdokshi agi kongshir aliba kibongtem aser nüburttem dang sorkari nüngdakba teyari agütsütsü, ta pai ashi aser mangyimer kibong den asükhu lemsatepa liasü.

Pai kin ajunga dang azüdokshi magizütsü aser tesunep lidaksütsü ayongzüka liasü. Dikho-i nüburttem dang tang tesüsa atalokba lendong ajanga telemsa adoker aliba tamajungba mekumdaksütsü mesüra state nung teti asoshi yimjung atema inyakba nung mokongshidaksütsü ayongzüka liasü.

9th NLA Session jakdang legislators senden alitsü

Dimapur, Luroi/August 27 (TYO): 14 buba Nagaland Legislative Assembly nung Legislators 60 prong 'traditional meeting' ka August 31, 2026 nikongdang 3:30 ako nungi tenzüka Chief Minister's Residential Complex, Kohima nung amentsü, ta sangdong ka ajanga ashi. Ibai September 1, 2026 nü nungi

tenzüka 14th Nagaland Legislative Assembly indang Session toku buba amentsü aliba dak sendakba nung alitsü.

Leader of the House ajanga aginüba ama iba senden nung Legislators ajunga adentsü ayongzüker, ta sangdong ajanga ashi.

Ano sangdong ka nung, NPF Legislature Party indang 'traditional

meeting' ka August 31, 2026 nikongdang 2:30 ako nungi tenzüka Chief Minister's Residential Complex, Kohima nung amentsü, ta metetdaksüogo.

Leader of the Legislature-i aginüba ama NPF Legislature Party züngsem ajunga iba senden nung adentsü ayongzüker, ta sangdong ajanga ashi.

Tribal Artisans Empanelment Mela agiogo



August 27 nü Tribal Artisans Empanelment Mela sentong nung tangokba noksa angur.

Dimapur, Luroi/August 27 (TYO): Ministry of Tribal Affairs, GoI tawabangba kübok Tribal Cooperative Marketing Development Federation of India Ltd (TRIFED)-i ayongzüka Directorate of Industries and Commerce, Kohima nung August 27 nü Tribal Artisans Empanelment Mela (TAeM) ka agiogo.

PM Vishwakarma aser TRIFED Collaboration dak sendakba nung jembiba mapang Joint Director, Industries and Commerce, Hojeto K Suqhe-i, Nagaland nung artisans tem jangjatsü, ajungkettsü aser ajangzükdaktsütsü atema Ministry of Tribal Affairs kübok Tribal Cooperative Marketing Development Federation of India Ltd (TRIFED)-i jenjang balala agiba atema kanga pelaba lemsatep.

PM Vishwakarma scheme indang jembiba mapang pai, state nungi artisans 2000 dak tema züngoksema lir aser trade

trok nung training agiogo, ta metetdaktsü.

Sentong nung shilem agia aliba artisans tem dang pai, parnok inyakyim atsülangshitsü atema iba maongka ya takok tashi agitsü aser TRIFED commercial network ajanga ajangzüksü ajungshi, koba ajanga teyongtsü nung yokyatsüyar meli-i artisan tem indang handicraft osettem yoktettsü teyari agütsür.

Tribal Artisan Empanelment Mela indang jembiba mapang Senior Programme Executive, TRIFED, Asif Ekbal Hussain-i, scheme aser shishilembatsü atema sabang balala agüja India ajunga nung tribal tem libaliro jenjang ajungkettsütsü atema TRIFED ya amenokogo, ta ashiba den Nagaland nung Ministry of Tribal Affairs schemes kübok TRIFED benoka inyakba nodal sorkar department temji Department of Forest, DUDA, Marcofed, asre Nagaland Beekeeping and

Honey Mission lir ta metetdaktsü.

Paisa, India ajunga nung artisan 5000 aliba nungi Northeast nung 3,500 shi lir, ta metetdaktsü aser ashiba agi, TRIFED-i item artisan tem ya züngoksemdakja saishilembatsü atema sabang agüja arudar.

Pai ashiba agi, artisan ka züngoksema sülen parnoki yangluba oset sample ka committee dangi quality, jenjang aser takhangba asadangtsü asoshi yoker.

Hussain-i artisan tem dang order aika angutsü atema retail nung sen aika agi meyoki whole sale nung ayoktsü ajungshia liasü. Züngoksema aliba artisan tem national exhibition tem nung shilem agitsü atema maongka angutsü akok, ta paisa metetdaktsü.

State Programme Management Unit, PM Vishwakarma, Suneptula Jamir lenisüba nung iba sentong agi aser laisa lokti pela agizükba o jembiba liasü.

Mkg DPDB-i lokti tentet tasen züngoksemtsü atema agizükogo



Dimapur, Luroi/August 27 (TYO): Ita shia amenba Mokochung District Planning & Development Board (DPDB) senden August 27 nü Deputy Commissioner's conference hall nung menogo.

Senden ya Deputy Commissioner & Vice Chairman of DPDB Mokochung, Ajit Kumar Verma, IAS lenisüba nung agia liasü. Taoba senden minutes lepa reprangshiba sülen senden tenzük aser jenjang balala agiba dak ajemdaker sensaksema liasü.

Senden nung board-i, Chuchuyimpang Students Union Society aser Kumlong ward nung amendaker aliba Woods

Foundation, ta lokti tentet ana züngoksemtsü atema officially agizükba liasü.

Iba den bendenloksema house-i, Hills Night High School nungja Hills High School agi melenba agizükogo. Tenüng melenba den board-i school ya Arkong ward nungi Chuchuyimpang nung Nokra Compound-i belener aotsü asoshi temelaba agütsüogo.

Kasa mapang nung Additional Deputy Commissioner, Atsunnga Walling-i, aruya aliba Inter-Departmental sports meet indang osang tejangja agüja liasü. Iba asayamung ya September 29 nungi October 1

nü tashi asayatsü.

ADC-isa, iba asayamung ketdangsüa achaayangtsü atema züngsem 24 agi tentetba committee ka tentettsüogo ta house nem metetdaktsü.

Maneni senden nung Land Resources Development (LRD) indang District Project Officer (DPO)-i department inyakyim indang PowerPoint presentation ka agütsü.

Taruba senden nung department inyakyim indang metetdaktsütsü asoshi Horticulture Department nem nonglokttsüogo.

Senden ya Deputy Commissioner-i tepela o jembir tembanga liasü.

IAF-i open recruitment rally ka ayongzüka agitsü

Luroi/August 27, 2026 (TYO): Agniveervayu atema Indian Air Force (IAF)-i August 31 nungi September 6, 2026 nü tashi Nagaland Armed Police Training Centre (NAPTC), Chumoukedima, Nagaland nung open recruitment rally ka ayongzüka agitsü.

Iba recruitment rally ya IAF-

i June 13 nü sangdongba Advertisement No. AGNIVEERVAYU INTAKE 01/2027 dak ajemdaker agitsü lir. Recruitment rally aser selection inyakyim dak sendakba nung osang tejangjaba Agniveervayu Intake 01/2027 atema official IAF advertisement nung angutsü.

90.8 Hills FM aser Intanki National Park na tenangzüktepba ka yanglu

Dimapur, August/Luroi 27 (TYO): Arem aser arem shiruru wazüka ayuba nung lokti nem shilem agidaktsütsü aser nüburttem nem tangazükba agütsütsü nükjidong nung 90.8 Hills FM - The Voice of Change aser Intanki National Park na tenangzüktepba ka yangluogo.

MoU nung August 25 nü sign sütepogo, aser 2026 küm September ita nungi tenzükba ita trok benoktsü. Iba telongjem ajanga Radio aser digital sabangtem ajanga arem aser arem shiruru wazüka ayutsü asoshi nüburttem nem tangzükba agütsütsü.

Iba telongjem kübok 90.8 Hills FM-i, arem, arem shiruru, biodiversity, meimchir aser shiruru na tsüngda tesendaktep aser Intanki National Park ya koda tongtibang iba dak sendakba nung tangazükba agütsütsü asoshi teyari agütsütsü.

Tenangzüktepba nung radio angartem nem arem aser arem shiruru wazüka ayutsüba

dak sendakba nung osang agütsütsü atema public-interest messages aser digital content balala metetdaktsütsüba densema lir. Iba sabang ajanga, Intanki park nung süngtonlitong aser arem shiruru balala wazüka ayutsü atema jenjang balala agiba indang metetdaktsütsü.

Iba partnership ajanga arem aser arem shiruru wazüka ayuba nung tongtepratep aser lokti-i shilem agitsü koda tongtibang, aser arem aser arem shiruru wazüka ayutsüba ya tekümsükba kübok aliba tesem adena or-a koda tongtibang aser nüburttemi angatettsü aser shilem agitsü koda tongtibang iba indang sayur.

MoU ya taküm September ita nungi 2027 küm February ita tashi benoka inyaksangshitsü, aser iba mapang 90.8 Hills FM aser Intanki National Park na wazüka ayuba inyakyim aser tangazükba balala agütsütsü asoshi longjemer inyakttsü.

NH New Delhi Joint Director den tepila sentong agi

Dimapur, Luroi/August 27 (TYO): Joint Director (Health & Family Welfare) & Senior Medical Officer, Nagaland House, New Delhi, Dr. Hentok Phom den August 25 nü Conference Hall, Nagaland State Guest House, R. K. Puram, New Delhi nung tepila sentong ka agiogo.

Sentong nung o jembiba mapang Joint Resident Commissioner, NH New Delhi, Sharon Longchari-i, küm 25 shi Delhi nung Naga nungertem nem teyari balala agütsüba atema Dr. Hentok Phom' dang kanga pelaba lemsatepba den, pai bendanga agüja inyakba ajanga Nagaland nungi temang anepalui arurtem coordinator tem den sendaktepa Delhi nung mozüki tajungtibatem nung temang anepalutetogo, ta ashi.

Longchari-isa, tenündakba paper works tem tembanga inyakttsü aser tia maka tatalokba kar nungbo tasümayang kidangi bener aotsüsa akümba mapang Phom-i inyakyim kanga junga benteta yua aliba ajanga asür kinungertem khuret pongbadaktsür, ta ashiba den, pai tenteta toktsüba inyakyim yagi Delhi-i temang anepalui arurtem kanga ajangzüksü ta

ashi. Sentong nungsa Deputy Director, Information & Public Relations & Senior PRO, NH New Delhi, Kuolie Mere-i, Delhi nung Dr. Hentok mapa tajung asoshi pa tenünsang jembiba mapang, pai jenjang tapet agiba ajanga Delhi NCR nung mozüki 19 Chief Minister's Health Insurance Scheme nung züngoksema lir aser Dr. Hentok-i achaayanga 2014 küm sabang ka amenokogo (koba students' union-i achaayanger), kong temulungertemi azü tenla agüja shirangertem nem teyari agütsür, ta ashi.

Tepila o jembiba mapang Dr. Hentok Phom-i Medical Officer ama pa Delhi nung tenzükba kümtem bilemtetshia jembiba aser pa atema tajungtibaji lokti ya liasü, ta ashi. Paisa, pa mezüng 2002 küm Nagaland House nung join asüba mapang pa Nagaland House staff tem tenzüksü atema liasü ta ashi.

Maneni NH New Delhi nung tanga officer aser staff temia Dr. Hentok Phom den inyakba parnok tajangshiba indang lemsatep. Dr. Hentok ya National Health Mission, Kohima indang State Programme Officer akümtsü.

Nepal tzümetzüng lendong nung India nunger 288 samaogo: MEA



New Delhi, August 27, 2026: Nepal nung tzümetzüng lendong agi kongshiba nüburtem yaritsü atema NDRF sepaitemi mozü aser chiyungtsü densema teyari oset balala bener otsütsü atema tayimtsü nung khu oshiketba mapang tangokba noksa nung angur.

New Delhi, Luroi/August 27 (Agencies): Nepal nung ajungbena tzümetzüng lendong tulu atalokba sülen iba linük nungji India nunger 288 samaba jangjaogo, ta Brihostibarnü Ministry of External Affairs (MEA)-i metetdaksü.

MEA otongdar, Randhir Jaiswal-i, Nepal nung samaba India nungertem rongnung hydropower projects nung inyakerter aser raliwalirtem aika densema lir, ta ashi.

Paisa, Tamil Nadu nungi India nunger 21 bo kümüzöko, ta ashi. Tibet nung India nunger 200-ia India dang teyari agüjang ta mepishiogo, ta pai ashi.

Tzümetsüng lendong tulu ataloker aliba tensa ka nung India-i akokba tashi Nepal nem teyari agütsütsü, ta pai metetdaksü.

Jaiswal-i, "Tang tashi nung India nunger 288 samaba jangjaogo. Parnok rongnung India nunger 73 bo Trishuli One Power Project nung inyakerter lir. Kathmandu nung aliba Indian Embassy-i India nungertem maitsüji jangjatsü atema project tongti ketdangsertem den tongtepratepdar," ta metetdaksü.

MEA-i, "Ano telok anabo (nisung 37 aser 49) Tamil Nadu nungi lir. Parnok Kailash Mansarovar Yatra atema Samrat Travels aser Fly Everest Travels ajanga Nepal-i oa liasü. Iba dak alia West Bengal nungia India nunger 32 Samrat Travels ajanga Timure-i oa liasü. Iba tesem ya Rasuwa district kübok lir," ta metetdaksü.

"Ano state balala nungi India nunger telok ka (nisung 61) aser

Kerala nungi India nunger 33 samaogo. India nunger telok tulu pongu nungi züngsemtem densema nisung ajak senteper 288 samaogo," ta Jaiswal-i metetdaksü.

"Tang ama tensa mapang ka nung India-i Nepal nungita yaridar aser par linük nüngdak apir akokba tashi parnok nem teyari agütsütsü renema lir," ta Randhir Jaiswal-i ashi.

"Tang tashi nungbo India nunger kwi asüar tejangja memetet. Onoki osang tejangja anguba sülen nenok den-a lemsateptsü," ta paisa shisem.

Bodhbarnü ajungben tzümetsüng lendong ajanga Nepal kübok district asem kongshi, aser Brihostibar tashi nung nisung 270 asüba jangjaogo aser meyirjang aika samaogo.

UP kübok Kanpur nung tayimtsü tsükokba lendong nung pilot ana asü

New Delhi, August 27 (Agencies): Brihostibarnü Uttar Pradesh kübok Kanpur nung nisung pezü tashi mentetba training aircraft ka tsükokba lendong nung instructor pilot ka aser training agir pilot ka na süogo, ta police-i metetdaksü.

Tayimtsüji anüngdang 11:30 ako meta Garg Aviation Training Center nungi apusoba sülen minute 20 shi lir tsükok, ta police-i metetdaksü.

Kanpur Police Commissioner Raghuveer Lal-i, iba lendong nung asür anaji Gujarat nungi instructor pilot

Sachin Bhatia aser Karnataka nungi trainee pilot Abhishek Pujari na lir ta jangjaogo, ta metetdaksü.

Osangbenertem den jembidang Raghuveer Lal-i, "Iba lendong nung nisung ana süogo. Pilot instructor aser trainee pilot naji anüngdang 11:30 ako nung yangi aliba Garg Aviation Training Center nungi apusoba liasü. Tena meyipa aruba mapang 11:50 ako meta iba lendong ya atalok," ta metetdaksü.

Police commissioner-isa, iba tayimtsü ya gol ana keta aliba aser nisung pezü tashi mentetba

tayimtsü ka liasü aser instructor pilot ji tayimtsü anitsü atema kanga mongin ka liasü, ta ashi.

Paisa, Directorate General of Civil Aviation (DGCA) nem iba osang metetdaksüogo aser iba tatalokba ya jungjunga bushisüngdangtsü, ta metetdaksü.

"Police-i iba tesemji longbanger wazüka lir. Tasümangji bener oadokogo. Tecnam tayimtsü ya training nung amshitsü atema 2023 küm yagi bener arua liasü. Technical timtem ali asü nunga ibaji DGCA-i bushisüngdangtsü," ta paisa metetdaksü.



August 27, 2026 nü Japan nung senden ka nung India Union Commerce & Industry Minister Piyush Goyal (tiyong), Mizuno Corporation Representative Director & President Akito Mizuno (abelen nungi pezübuba) aser tangartem tangokba noksa nung angur.

SCO senden aliba mapang nung PM Modi-i Russia Tir ajurutsü

New Delhi, August 27 (Agencies): August 29 nungi September 1 anogotem nung Ato kilonser Narendra Modi-i Uzbekistan aser Kyrgyz Republic semdangtsü, ta Brihostibarnü Ministry of external affairs (MEA)-i metetdaksü.

Ato kilonser Modi-i Tashkent semdangtsü aser Bishkek nung 26buba Shanghai Cooperation Organisation (SCO) Summit nung shilem agia adentsü.

SCO senden aliba mapang nungsa Ato kilonser Modi-i SCO lenirtem den jurila senden amentsü. Modi-i Russia Tir, Vladimir Putin-a ajurua senden amentsü.

Modi-i Tashkent nung Shastri Memorial semdangtsü aser Tashkent State University of Oriental Studies nung aliba Mahatma Gandhi Centre-a semdangtsü.

Tang agi pezübenbuba Modi-i Uzbekistan linük semdangtsü, ta MEA Secretary (West), Sibi George-i metetdaksü.

MEA Secretary (West)-i, tesüiba küm aika India aser Uzbekistan na tsüngda tesendaktep kanga junga lir, ta metetdaksü.

MEA Secretary-i, Uzbekistan nunger atema shishilemba partner linüktem top 10 nung India densema lir aser linük ana tsüngda shishilembaba aser investment ji dollar sen billion 1 jenjang lir, ta metetdaksü.

"Linük anati tongtambang minerals, pharma, shisaliok, information technology aser health sectors nung amalitepa inyaker," ta pai ashi.

2005 küm nungi India ya SCO nung Observer ka liasü aser 2017 küm iba tentet nung India-a züngsem ka aküm.



August 27, 2026 nü Toronto, Canada nung CII aser Canada-India Business Council (CIB-C)-i ayongzükba senden ka nung Union Finance Minister Nirmala Sitharaman, Chief Economic Advisor V Anantha Nageswaran aser CII-National Future Tech Manufacturing Mission Chairman, Pranav Kapuria nunger tangokba noksa nung angur.

Tang general election agi nunga NDA-i menden 326 angutsü: Survey

New Delhi, August 27 (Agencies): Tang India nung Lok Sabha election agi nunga BJP-i aniba NDA teloktepi menden 326 angutsü, ajisüaka NDA jenjang tera tamajungba kümogo, ta India Today-CVoter indang Mood of the Nation (MOTN) survey ajanga metetdaksü.

Tang NDA sorkar küm 12buba lir aser tang election agi nunga NDA-i menden 326 nung takok angutsü, saka taküm January ita nung agiba survey den medemdangra parnok jenjang tera tamajungba kümogo, kechiyong taküm January ita nung agiba MOTN survey ajangabo NDA-i menden 352 nung takok angutsü, ta asadangteta liasü.

Taoba Lok Sabha election atema nüboyimba mapang nung Ato kilonser Narendra Modi-i '400 paar' (menden 400 dak tali) yimiyim ayima liasü saka tawa agiba survey osang ajangabo parnok jenjang tera ajema akümba bushiteter.

MOTN survey ajangasa, Congress-i aniba teloktepi menden 185 angutsü ta asadangteta.

Tesüiba küm 20 tashi India Today Group-i Mood of the

Nation survey ya küm shia anaben agia arudar. August 2026 edition ya CVoter-i ketdangsüa agia taküm July 1 nungi August 25 anogo tashi nung nisung 25,184 nungi telangzüba meshia iba osang renema liasü.

Iba dak alia tesüiba ita trok tsüngda interview 91,795 agiogo.

Party tem sasep nung, tang election agi nunga BJP-i menden 261 nung takok angutsü; ita trok tejaklenbo BJP-i menden 287 angutsü, ta asadangteta liasü.

Iba denji kasa tang election agi nunga Congress-i menden 106 nung takok angutsü ta asadangteta; January nung agiba survey nungbo Congress-i menden 80 nung takok angutsü, ta asadangteta liasü. Iba tetezü Congress jenjang tera tajungba kümogo.

Vote anguba shilem sasep nung NDA-i vote shilem 45.1 angutsü (January MOTN nungbo vote shilem 47) angutsü ta asadangteta.

BJP-i aniba NDA teloktepi vote shilem 39.1 angutsü ta asadangteta; taküm January ita nungbo NDA-i vote shilem 39 angutsü, ta asadangteta liasü.



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 28, 2026

Impur tenla ki

Naga lima nung America nungeri akümba yim ana lir, kaji Molungyimsen aser kaji Impur. Yim anaprongla ya tang Nagaland state aliba Naga limai mezüng Yisu temeim osang tajung bener arua sangoktsüsang Dr.Rev.Edward Winter Clark-i akümba dang masü saka tenünga dena pai jatettsüba tenüngtem lir. Aji oda, Clark-i anir 1894 küm Yisu Khrista temeim osang tajung Naga kintem dangi ayimsünga sangdongtsü asoshi Mission Center asütsü atema, Impur ya mesemtet aser 1896 kümbo Impur nung arogo tentet. Iba Impur arogo tenzükdang America nungi aruba missionary Rev.S.A.Perrine mendenbuba aser pa kinungtsü Wt.S.A.Perrie tezülula ser tenzüker aser parnok leniba nung Impur arogo nung sannüker asütsü asoshi Robi shim aser Wb.Harriet tezüluba liasü. Ajisüaka, 1936 küm tashi Impur arogo tenla ki balaka yanglua mali asü, anungji 1936 küm Merangkong yimti nung Ao Mungdang 40 buba lokti senden alidang, Impur tenla ki asütsü lemtet aser iba tenla ki yanglutsü atema sen bushia inyaksü luden ka nung Missionary Rev.B.I.Anderson, Headmaster Mangyangnokcha, Kumbho (Angami) aser Evangelist Kijungluba nungertem shim. Parnok nem nungloktsüba ama Impur tenla ki asütsü atema temulunger tenla meshia, iba mapang tashi nung Impur nung züngteter aoertem parnok 180 dangi shiti zülü. Iba shiti ngua parnoki tenla agütsüba ji sen ajak agi Rs.1096.29 paisa liasü. Iba senji amshia Mungdangi shimtsüba luden jagi Impur Baptist Arogo tenla ki süngtsük aser yinjung agi topur kanga junga ka yanglutet. Iba tenla ki yanglur joko küm 90 ajunger aser tang tashi iba tenla kidangji Impur Baptist Arogo sentep sentong agia Tsüngrem külemdagi. Atangji, taoba küm 90 tsüngdang tenla kiji teyanglushia kanga yuanglushiogo saka 1936 küm yangluba ki temangji memelenshii kasa süngtsük aser kasa yinjung nung dang tanü tashi tenla ki nokdaka lir. Ajisüaka, süngtsük ki tejen akümba agi lokti sentep sentong akatsü mesademi aküm nung, yaküm küm nungi tenzüka Impur tenla ki tasen ka sen crore pungo shi endoka yanglutsü mapa tenzüko. Atangji, temenungratsüka aser tapayutsüka asünungji, otsüsütsüsa nungo küma ayutsü atema 1936 küm yangluba tenla kiji mebendoki ayutsü. Impur Baptist Arogo yabo tanga lim arogo amato masü, yangi teti kibur küma alitsü pur arogo züngsem kata mali, saka züngsem ajakji khen atema arua alirtem dang lir. Parnokji kar ABAM nung inyakterem, kar Impur Bible Seminary aser kar Clark Memorial school nung azüngertem aser kar Impur mozü kidang inyakterem lir. Anungji, parnokji pei inyakba aser azüngba mapang temerbo Impur nungi oa adoker. Ibayongji, Impur Baptist Arogo asoshi tenla ki ka sen crore pungo endoka yanglutsüba ji tanga lim arogo tem dang nungibo khuret noklangben agi tuluba lir. Atangji, ibai ABAM arogo ta asütsüa langa lir, anungji tenla kiji ABAM senpong nungi agiteta yanglutsüla ta asenok aikati bilemtsüa akok. Ajisüaka, asenoki bilemba amaji masü, ABAM arogoji la den aliba lim arogo ajakji lir, anungji Impur arogo atemaji balaka kibur küma khuret mebenteter. Ajisüaka, ABAM nung inyakterem külemba tenla ki asünungji, ABAM-ia akok tashi senotsü agia yaridagi. Atangji, Impur arogo nung züngsem akümba indang bilemdang dangbo, tenla ki tasen ka yanglutsüba ji mapa kanga tasak saka ano kodang jungjunga bilemdangdir, Impur arogoji Aotsür Aor Baptist tamangertem ajak arogo aser tenla kiji tamanger ajak külemdak arok meyong tenla ki lir. Ibaji angateta, tang tashi nung tamanger kija, kibong aser arogo aikati tenla tajung agütsüba ajanga Impur tenla ki yangluba maparen kanga junga inyaka odagi. Iba tenla ki tasenba nung sangküm kümbo Impur nung alirtem dang masü saka asenok oli-orartema tekülem mapang agitetsüsa renemtsü sentong nung lir. Atangji, Impur Baptist Arogo tenla kiji Aor inti meyong tenla ki asütsü aser iba tenla ki jagi America nunger missionary-tem ajanga asenok dangi Tsüngrem Taochi aser Temeim Osang Tajung aruba anogotem bilemteta asenok tamang aser telungjem tashi itshitsü.

OLEMSABANG

NAGA LIMA JI KHRISTAN LIMA KA AMA MAPA AGI SAYUTSÜLA

~ L. Kika Pongener

Asen Naga lima ya Khristan tamanger nutsüng yongsuk noklang shilem nung tokür (90 %) shi aliba linuk ka lir. 'Naga lima Khrista asoshi' (Nagaland for Christ) ta alima dang yimjak nung yimyim ayimoktsüba lima ka lir. Nagaland Legislative Assembly nung tatar (MLA) roker (60) prongla Khristan tamanger temeja mena lir. Nagaland sorkar tenzüka mapa nung tenzükertem tsümar aser tangar kin kar dak alaka; asen Naga nungerbo ajunga Khristan tamanger tajung dang mena lir. Anungji Naga lima nung sorkar sentong aser inyakyim ajak nung; nuburtemi temulung melemtetsüsa aser ashishitsüsa kecha meli-i ochishia aser meruk-meruka inyakba linuk ka asütsüla. Ajisuaka, sorkar nungi tenzüker lokti-tentet tilatiba tashi nung; nuburi temulung melemtetsüsa aser ashishitsüsa lenmang aisu nung ochimashi (Corruption) mapatem inyakba angur. Anungji item ochimashi mapatem anema arogo tem aser mungdangtem ajaki tasü-ita ochi ola adoktsüla.

Asen Naga nunger nubur aikati tai-a ta angatet-yongjia; metetsümong-aka aibelena inyaksü temulung ulur. Atangji, nisung aikati pei ajangzüksü bushidang aser senotsü tajangzüker aginudang metetsümonga ochimashi mapatem odang inyaker. Küm ana-asem shi suia ogo; asen Naga lima tesem kar nung 'High Way' lenmang tuluba küma ulushia (Four-lane & Two-lane) yanglushia aodang; ali kibur kariibo ki-o-jen raksaba temenok sen (Compensation) angutsü asoshi; nisung shinga malidak arem nung; lenmang sudaka nungdak maliba ki tilala yanglua aoba-a ngua aruogo....!!! Aji oda, iba amaji jakdak-jakdaka ochimashi mapa inyaka senotsü tajangzüker agitsü bushibaji Tsüngrem tsüngdang khuret tulu ta tsüba mebilemer. Iba ama taila ki raksaba nungdem nung sen temenok (Compensation) metetsümonga agizüka agitsüba ji Tsüngrem tsüngdang aibelener aser khuret tulu ta meshisadanger. Aji oda, iba ama ochimashi mapatem inyakbaji; Khristan noklang shilem nung tokür (90 %) tashi aliba lima ka nung; arogo nung züngsem tajungtemi kecha marentaki aser metsübai inyakteper.

Ano asen Naga lima nung Election aruba shia arogo pur aser tamanger tajungtemi pei temeden Vote sen-yong ayoker. Yongji, asen lima nung Candidate-tem Election shia sen Crore asem-pezü tashi endoker; karbo talia endoker. Election nung asen Naga lima kinuk-kisang ajak nung yi taluposa ayoker. Jila aser yimtsüng aika nung nisung teshimtet kari dang yimer aser nubur ajunga vote (Proxy) ajentsüba; Polling Station Coup asüba iba amala aika ataloker. Ano tesem kar nungpo pei yimer o yimer na tsüngda raratepa, züktepba, long agi ontepba aser nisung taküma dena tepsetba iba amala mapatem ataloker. Yimtsüng aika nung Election Commision temzüng-özüng alema aibelena inyakba nguaka; mungdang aser arogo nung toklang tenzükertemi ola madoki repranga toktsüba angudang kanga sungmanger....!!! Yimtsüng kar nungpo Election temzüng-özüng alema aibelena inyakba nungji arogo nung toklang tenzüker dena tongti shilem agia inyakba-a ngua aruogo. Aji oda, item ajak teraji jungjunga bushidangra; sen meimba aser rongsen penbuba ajanga lir. Anungji arogo-i aser mungdang ajem-ajema meli-i; item mapa tamajungtem anema tasü-ita ola adoktsüla aser akokba tashi metongshitsütsüla.

Tang ya India lima ajunga nung nutsüng yongsuk (Census) züngdangtsüba mapa tenzüka aoba angur. Aji oda, tesuiba mapang. küm aika dang tiyazü nutsüng-yongsuk (Population) zülur yimtsüng terenlok mapa atema sanction agiba; tiyazü E / Roll zülur Election nung Vote agütsüba....Iba amaji tamanger tajungtemi metetsümonga aibelena inyakba aika ajangshia aruogo. Jokorla, tangbo itemji tai-a ta angateter asünungji item mapaji meinyaktsüla. Jokorla, tangpo yimtsüng ajak nung shitakba Cencus aser shitakba Electoral Roll dang zülutsüla aser iba mapa inyakdang arogo nung toklang tenzüker aser mungdang tenzükertemi aibelen mesui inyaksü ajangshitsüla. Tang ya-a asen Naga lima tesem kar nungpo tiyazü nutsüng-yongsuk züluktsü atema taila ki tasen yanglua aoba osanga angazüker. Aji oda, Khristan lima ka nung jakdak-jakdaka iba ama aibelena inyakbaji metetsümonga aibelener asütsü. Anungji item mapatem anema arogo, mungdang aser NBCC-i sashi-sashia aitsütsüla aser metongshitsütsüla. Naga limaji Khristan lima ka ama alima nubur dang ochishia inyaka sayutsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

United Bible Societies-i yaküm Laishiba million 148 lema agütsü



Jakarta nung United Bible Societies (UBS) küm 80 ajungbamong sentong nung tangokba noksa nung angur.

August 27, 2026: United Bible Societies (UBS) küm 80 ajungba nüngtem nung parnoki Laishiba million 148.3 lema agütsü; 1946 küm UBS tentetba sülen tang tashi nung parnoki linük 240 nung Laishiba billion 1.1 lema agütsüogo.

"UBS Distribution Statistics Report 2025" ajanga ashiba agi, yaküm parnoki lema agütsüba Laishiba million 148 nungjagi Laishiba rangben (Tasen Lai & Tejen Lai) million 22.4, Tasen Lai million 10, Laishiba shilem kar million 115.9 densema lir.

"Bible ministry nung kaket kuma yangluba Laishiba ya kangasa tongtambang, ajisüaka tensa mapang den apet lenmang balala ajanga nisungtemi Tsüngrem O azünger," ta UBS-i metetdaksü.

Tesüiba küm ter tsüngda UBS-i Laishiba billion 2.3 lema agütsüogo, aser ibaji ajanga tesem ajaklen nisungtem nem Tsüngrem O züngdaksütsü atema melungteter inyakba sayur, ta report nung shia lir.

"Onok indang ministry nung tongtibtangtibaji Laishiba lema agütsütsü atema lir, kechiyong Laishiba meyipzükba ajanga dang nisungtem ket aser melungjang atonger," ta UBS-i ashi.

Iba dak alia Bible Society indang resource balala million 26.4 ben download süogo aser Laishiba nung keta aliba tapu balala billion 32.2 ben reprangogo, aser ibaji 2024 küm den medemdangra shilem 13.8 agi teimba akümba lir.

"Item kuli ajanga nisungtemi mobile phone aser digital platform balala ajanga Laishiba kanga sapua azüngba kuli sayur, ajisüaka tang tashi alima tesem aika nung kaket kuma yangluba Laishiba ya kanga tongtambang," ta UBS-i ashi.

UBS-i Laishiba teimtiba alemba regions ji Central & South America liasü.

Asia nunga maneni Tasen

Lai den Laishiba resources kanga nüngdaker aser Africa nunga Laishiba kanga nüngdaker.

Ano anüolen aliba regions nungbo nisung aikati digital platforms ajanga Lai azünger. "North America, Europe, Middle East aser Oceania regions nungbo Laishiba kaket masü saka digital nung taliba nüngdaker," ta UBS-i ashi.

"Yaküm alemba Laishibatem rongnung oshi teimtiba nung adoka alemba oshitemji Spanish, Portuguese, English, Mandarin aser Indonesian liasü. Oshi teimtiba nung Lasihiba adoka alemba oshitem top 10 nung Swahili, French, Tagalog, Telugu aser Korean oshitem densema lir," ta UBS-i metetdaksü.

Yaküm lema agütsüba Laishiba shilem 69 bo item oshi 10 nung adokba Laishiba liasü.

Ano yaküm digital Bible chapters teimtiba reprangba

oshi asemji English, Spanish Portuguese oshitem liasü.

"Digital Bible downloads asüba teimtibaji Portuguese oshi liasü; iba sülen tanabuba aser tasembuba jenjang nung Spanish aser English na liasü," ta UBS-i metetdaksü.

Ano külen audio ajanga oshi balala nung Laishiba angaba mezüngbuba jenjang nung Spanish liasü, iba sülen Portuguese, French aser English oshitem liasü.

"Nisung ajaki Laishiba züngtettsü mesüra angatettsü atema maongka agütsütsü asoshi Bible Societies-i inyakba ajanga nisung aika taküm kongshir," ta UBS-i metetdaksü.

"Laishiba ajenba aser belenshiba nung maneni sen teimbateimba dang adoker, ajisüaka digital platforms ajanga Laishiba azüngtsü aser angatsü atema maongka tasen aika lapoktsür," ta UBS-isa metetdaksü.

Uttar Pradesh kübok Prayagraj nung Khristan asem apu

August 26, 2026: Uttar Pradesh nung Hindu nationalist lenir kati tashishiba ken o agütsüba nung ajemdaker police-i tetsür ana densema Khristan asem puogo.

Shirang aneptsüba sentong ka nung sensakertem Khristan yimsü dangi meyipdaksütsü merang, ta tai tongloksüba nung ajemdaker Khristan asemji apu.

Prayagraj city Assistant Commissioner of Police, Brijesh Pathak-i, state nung aliba anti conversion ozüng nung ajemdaker August 25 nü Khristan asem apu, ta metetdaksü.

FIR nungji Khristan asem-Subedar, Rekha Devi aser Sadhna nunger tetshia lir. Par asempronglaji Prayagraj district kübok Kathauli yim nungi lir.

Par asem denji külemi kasa district kübok Rajapur yim nungi Chanda Devi aser

Ranno Devi na den mejangjaba nisung 100-i tangartem Khristan yimsü dangi meyipdaksütsü merang, ta Hindu leniri parnok nem tai tongloksü.

Amongnü (August 23) Prayagraj yimti tezülen aliba Kathauli yimdak shirang aneptsüba sentongji ayongzüka agiba mapang nung parnoki tangartem Khristan yimsü dangi meyipdaksütsü merang, ta FIR nungji shia lir.

"Khristantem adenshia sentong agiba osangji angashiba sülen iba yim jagi Police ao. Tang iba tatalokba ya bushisüngdangdar," ta Pathak-i metetdaksü.

Khristantem anema ken o agütsüsangji Bajrang Dal lenir, Shubham Kumar lir. Bajrang Dal ya Vishwa Hindu Parishad (VHP mesüra World Hindu Council) indang youth wing lir. Kumar-i, shirang aneptsüba

ANO GO ABEN TSÜNGREM DEN

Meimtsü Angazükang

Medemer medemer asoshi temeim nung aser nisung ajak asoshi temeim nung Kibubai nenok tali rena züindakjang.

Saka adianu meimtepba indang nenok dangi zülutsü tenüngdaksü maka, kechiaser medemer o medemer na meimteptsü Tsüngremi nenok dang sayur. 1 Tesaloknika 3:12; 4:9.

Tsüngrem temeim lir (1 Yn. 4:16). Pa yimyaji tabensa temeim lir, saka temenen yong Pa temeim Pa chirtem dangi teti yimya nung angati marur. Na temeim mesayuba kibong ka nungi iner alitsü akok. Nai meimba kar ajanga ne nem timtem agütsür alitsü akok aser tanaben iba timtem marudaksütsü atema ne mulungjang meranga kümer alitsüa akok. Nai kar dang meima alitsü akok saka o nung aser mapa nung temeimji mesayuteti alitsü akok.

Pauli Tesalonika nung aliba Khristantem meimtepa alitsü zülü (1 Tesa. 3:7). Parnoki koda meimteptsü aji sayutsü Paul menüngdak, kechiaser Tsüngremi parnok dang meimteptsü sayutsü. Tsüngremi parnok nem Pa temeim agütsütsü aser parnoki Pa anidakdang, Pai iba temeimji parnok ajanga renlok daksütsü. Parnoki kar dang memeimtetti lira Tsüngremi Tanela Temeshi ajanga parnoki meimdaksütsü.

Tsüngremi asenok tashi mait asoshi Pa taochi agütsür, aser asenoki tangar dang meimtsü renemdaksür. Idakji balaka kecha mali. Nisung tamajung danga meimtsü Tsüngremi sayur.

Nai kar dang meimtsü timtema bilemer asü? Tsüngremi na yaritsü. Pai nai ne tsürabur, kinüngbo- kinüngtsü, ne chirtem, ne tembartem, mesüra tsükchirtem meimdaksütsü. Nai ne temeim tetezü kaa mesayutetra, ibaji koda inyaktsü Tsüngremi ne dang sayutsü. Temeim nung kiburji Tsüngrem lir. Na tangar den alidang temeim adokdaksütsü mesüra sayutsü Tsüngrem dang asüngdangang.

sentong nungji aika Khristan telok balalai tai tongloksür, ta yimsü dangi meyipdaksü, ashi.

ajisüaka VHP aser Bajrang Dal züngsemttem iba tesemji shirang aneptsü atema tonga aoba mapang nung sarasademba nungji kechi tai parnok aika jena oadok, ta ali?" ta pai asüngdang.

metetdaksü. Uttar Pradesh nung reshikangshi ajangshiba Police-i mezüngbo FIR Khristantem atema ken o nung shia aliba nisung pongu jembitsür, advocate P V apu saka kuli peria maliba Ratnam-i, Uttar Pradesh ajanga Chanda Devi aser densema anti conversion ozüng Ranno Devi nabo chiok, ta benokba aliba state tem nung Pathak-i metetdaksü. Khristantem anema inyaker; India nung nütsüng teimba aliba state, Uttar Pradesh nung yimsü dak sendakba Khristantem anema inyakba sentongtem anemba aser kanga bulua ataloker. nütsüng ajema alirtem anema anti-conversion ozüng amshiba Pastor Ravi Mohan-i, state nung pastor tem densema ya tejashitsüka lir, ta ashi. Khristantem apuba ya yimya ka 2024 küm kija nunga Uttar kümadokogo, ta metetdaksü. Pradesh nung Khristantem anema inyakba tatalokba 209 Paisa, Khristantem tekülem liasü.

sentong agiba mesüra Khristantemi charity mapa Nütsüng million 200 dak tali inyakbaji tangartem Khristan aliba Uttar Pradesh state nung yimsü dangi meyipdaksütsü Khristan nütsüngbo shilem kata atema lir, ta Hindu nationalist majung.

AO OSHI ANGAZÜKDAK:
TANÜ ANGAZÜKTSÜBA OJANG



Züro

(adv) ajaki nükshitsüsa sempet tajung aketba (good personality)

* Züro aketba nisung ajaki aginür.

Züsa

(v) süngo enzüka lemsaa ajemba (sharing tea out of a tea pot)

* Onok mapa inyakertem ajak süngo züsaa jemer senshi.

OLONG PAITEP # 7603012

	1				2	3				
4			5						6	
						7				
	8									
	9			10			11			
						12			13	
14										
						15				

TIPLÉN

2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsümapangtsüadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

1. ____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 76031 TELANGZÜBA

TIPLÉN :

2. Pongsén, 5. Lepko, 7. Omen,
8. Maangka, 10. Yangkhu,
12. Senpong, 14. Angu, 15. Raksa,
16. Arameso

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NRF-i train thitsüba aser mapang
melenshiba metetdaksü



Dimpaur, Luroi/August 27

(TYO): New Harangajao station anasa Railway track tem (Line-1 and Line-2) yanglushia aliba ajanga Northeast Frontier Railway (NFR)-i traine service nung temelenshi aliba metetdaksüogo.

Mapa tinyakdak aliba ajanga Lumding-Badarpur Hill Section nung train ya Line-3 ajanga senzüdar. Mapa tinyakdak lir asünung NFR-i train kar thitsüogo aser kar mapang melenshitsuogo, ta Chief Public Relations Officer Kapinjal Kishore Sharma-i metetdaksü.

Train thitsübatem:

* 28.08.2026 nü train No. 15615 (Guwahati - Silchar) Express thitsüogo.

* 29.08.2026 nü train No. 15616 (Silchar - Guwahati) Express thitsüogo.

Train mapang melenshiba:

* 28.08.2026 nü train No. 15650 (Narangi - Agartala) Express Narangi nungi 18:30 hrs nung apusotsü.

* 28.08.2026 nü train No. 20507 (Sairang - Anand Vihar Terminal) Express Sairang nungi 20:10 hrs nung apusotsü.

Manipur nung Naga nunger 4 tepset, ka yiru



Guwahati, Luroi/August 27

(Agencies): Manipur kübok Kangpokpi district Brehostibarnü IT Road nung telungpurtemi mendanga atar amakba sülen Naga nunger civilian pezü tepset, ka yirutsü aser ka samar bushidar, ta source balala ajanga metetdaksü.

Iba lendong ya anepdang 8:30 ako meta Makui Ashang aser Thanamba Naga na tsüngda iba tesem nung aliba

Naga nungertemi amshiba lenmang ka nung ataloka liasü. Source balala ajanga ashiba agi, telungpurtemi mendanga atar iba lenmang nung senzürtem ya maka liasü.

Iba lendong nung Naga nunger pzü tepsetogo aser ka yiruja liasü. Kasa mapang nung ano nisung ka samar bushidar.

Tang Naga nunger tem amakba ajanga Kangpokpi nung tensa mejungi kümogo, kong 2023 küm May ita Manipur

nung kin o kin tsüngda mangatettep adokba sülen mapangshia lendong balala ataloka arudar.

Iba osang agütsüba mapang tashi nung tatalokba dak sendakba nung police-i kecha osang magütsü liasü.

Lendong nung asürtem aser yirur alir indang osang tejangja memetet aser parnok ya kechiba amak ajia osang agütsüba mapang tashi nung mejangjai liasü.

Sikkim: SIBLAC-i PM Modi dang hydropower
project tasentem sota atatsü mepeshi

Guwahati, Luroi/August 27

(Agencies): Sikkim Bhutia Lepcha Apex Committee (SIBLAC)-i Ato Kilonser Narendra Modi dang state nung hydropower project tasentem sota atatsü, aser kidanger Nepal nung tzümetsüng lendong tulu atalokba sülen tang benoka aliba project tem kanga junga asadangtsü atema bushisüngdang ka asütsü asoshi tetuyuba agütsütsü mepeshia asüngdangogo.

Bodhbarnü nikongtsütsü sangdong ka ajanga SIBLAC convenor Tseten Tashi Bhutia-i, Nepal nung lendong tulu ataloker aliba mapang state nung terenlok maparen balala asadangshitsü asoshi ayongzüko.

Bhutia, shiba Sikkim nung BJP indang chief advisor lir pai, tzümetsüng nung asürtem den asükhu lemsatepba den teküzmükba maparen takok ngua inyaksü asoshi imlaja ataba lemsatepogo.

"Nepal nung tatalokba ajanga Himalaya tenemtsüng

nung aliba tesemtem lendongbang nung aliba sayur aser terenlok maparen balala asadangshitsü nüngdaka kümogo," ta Bhutia-i ashiba den Centre dang Sikkim kübok ayongtem nung hydropower project tasen yanglutsü sentong alibatem asadangshitsü mepeshia metetdaksüogo.

Nepal nung hydropower infrastructure tem kanga mejungi raksaba sülen iba takhangba agütsüogo. Nepal Electricity Authority-i Bhotekoshi aser Trishuli ayong nung hydropower projects 13 tashi tzümetsüng agi kongshiba osang agütsüogo.

Tibet kübok Gyirong tesem nung rürjeb aser long anenzüka aluba sülen tzümetsüng ya alua liasü. Tzümetsüng agi lenmang, power infrastructure aser yimtsüngtem kanga mejungi raksatsüogo.

Tzümetsüng agi raksatsür aliba facility tem rongnung Nepal kübok Rasuwa district nung 111-MW Rasuwagadhi Hydropower Plant densema lir.

Iba lendong atalokba sülen SIBLAC-i mapang atakzüka yur Sikkim nung hydropower project tem asadangshitsü ayongzüko. Committee-i ashiba agi, tang aliba aser yanglutsü aliba power plant tem nung environmental, geological aser seismic impact tem asadangtsüla.

Parnokisa, state nung hydropower terenlok ajanga lokti liba aser security dak kongshiba indang kanga junga asadangtsü ayongzüko.

Maneni SIBLAC-i Centre dang ken o asadanga sülen tengutetbatem lemsateptsü asoshi mepeshia metetdaksüogo.

Committee-i ashiba agi, parnoki rongsenketzüng nung terenlok anemer masü saka terenlok maparen balala ajanga state dang mekongshitsüla.

Kasa mapang nung Sikkim sorkari, state nung alir kar danga Nepal nung tzümetsüng lendong agi kongshir lira parnok nem teyari agütsütsü atema helpline tem amenoktsüogo.

BTC Deputy Speaker Narzary par kidang sür lia ngutet

Guwahati, Luroi/August 27

(Agencies): Bodoland Territorial Council (BTC) Deputy Speaker Bijit Gwra Narzary, Bodhbarnü nikongtsütsü Assam nung Tamulpur district kübok Kumarikata nung par kidang sür lia ngutetogo.

Narzary ya BJP lenir ka lir aser BTC nung Darrangajuli constituency nungi shimba lenir ka liasü. Pa ya par kidang sür lia ngutetogo, ta police-i ashi. Pa asüba kuli jangjatsü atema

inyaktepdar, ta kasa sangdong ajanga metetdaksü.

BTC tekolakba aser Bodoland People's Party tir Hagrama Mohilary-i, Narzary ajungbena asüba osang angazükba sülen mang ayimba lemsatepogo.

Asükhu lemsatepba mapang Mohilary-i, BJP lenir Narzary asüba ya melentsü makok aser lokti atema takoksa tulu lir, ta ashi. Paisa, Narzary'er kinunger, tembartem, külem tenzükertem

aser pa pusemertem den asükhu lemsatepogo.

Taoba BTC tekolakba aser United People's Party Liberal (UPPL) tir Pramod Boro-ia, Narzary asüba osang angazüka asükhu lemsatepogo.

Boro-i asür kinungertem den asükhu lemsatepba den Narzary tanüla atema sarasademtsüba aser asür kinungertem asükhu koktettsü atema tasü tait tanüla angutsü imlaja ataba lemsatepogo.

Himalayan tzümentsüng sülen Nepal aser China nung asür tali akumer

Trishuli, Luroi/August 27 (Agencies): Tenemlen ayong nung rer, lishi aser long nungoka ajungben tzümentsüng adokba ajanga Nepal aser China nung nisung 1,000 dak tema samaba sülen Brehostibarnü ketdangsür temi Nepal nung jana-reja agi sünga aliba lenden aser tenemtsüng len takum alirtem bushiba mapang lir.

Bodhbarnü alimar lendong ajanga Kathmandu aser Tibet nung Lhasa sendaktepba lenmang nung temeshi ainlen jajar agi sünga aliba lenmang ka nung alirtem ajunga nungzüker aoba sülen Nepal nung ketdangsür temi takum jenbua alirtem kumzüksü aser emergency supplies agütsütsü atema helicopters amshir.

Asürtem ta 359 alemtsü imlar, ta police-i ashir, aser nisung tasü mang aika tenemlen nungi tzümentsüng agi nungzüker aluba lenden len nguteter.

Nepal indang Home Minister Sudhan Gurung-i ashiba agi, takum jenbua alirtem bushiba nung rangloker aser rescue team temi Trishuli temeket nung tesashitiba kongshir aliba tesemtem nung samar aliba India nung 100, shirnok temeshi ainlen jajarterm

timba lir aser China nung 25 ngutetogo. Tang tashi bendanger 650 kong koma aliar mejangjateter aser Nepal ketdangsür temi tang tashi par nübur samar aliba mejangjateti lir.

Tibet indang Gyirong county nung samar aliba nisung 558 lir aser yangji bendanger 260 dena lir, ta Chinese state broadcaster CCTV ajanga Brehostibarnü ashi. China-i iba lendong nung asüba nisung asem lir ta ashir.

Linük anaprong nung samar aliba bendanger tem ya linük 20 dak tema nungi lir aser itemji India nung 288, United States nungi 63, Malaysia nungi 51, Australia nungi 34, Britain nungi 33 aser Canada nungi 25 alitsü.

China-i search and rescue operation nung Nepal den osang agiteptar aser arütsü alema oa Nepal nung iba lendong agi kongshiba tesem nung China nung 100 jungnüa lir, ta Chinese foreign ministry ajanga ashi.

China Ato Kilonser Li Qiang, linük nung ketdangsür jenjang tanabuba, Brehostibar nikongdang Gyirong-i aru. Jelia osang mesangdongi ajungbena pai iba tesem semdangba ajanga Beijing-i iba lendong ya

linük nung teinyaksü tematiba ama züngshiba sayur.

Tzü aser jana meyokteper nungzüka alua Gyirong nung border crossing ka nungi nisung aika pongzüker ao aser tsünglangleni yimzüka aludang Nepal nung nisung aliba ki, lenmang aser power projects tem nungzüker oa liasü.

Tamajungtiba kongshiba Trishuli nungi mile 62 shi pilar Chitwan district nung ketdangsür temi ayong nungi nisung tasü mang 103 ngutetogo, ta iba district administrator Ganesh Aryal-i ashi.

India-i agütsüba süki, chiyongtsü aser tanga emergency supplies tem helicopters amshia yoker, ta Nepal army odongtar Raja Ram Basnet-i ashi.

Army aser police 5,000 dak tema arua yaritepa Brehostibarnü nisung 125 anitetogo aser yangji bendanger 20 dena lir, ta pai ashi.

Tzümetsüng agi tesashitiba kongshir aliba district, Nuwakot nung tensa asadangtsü atema Nepal Ato Kilonser Balendra Shah gari nung ogo, ta pa indang office ajanga social media nung ashi.

Qatar PM-i yimjung bushia Tehran semdangtsü

Dubai, Luroi/August 27 (Agencies): Iran den shishilempaba linüktem nem sanction agütsütsü ta Washington-i Tehran dak tenük yoker amokmerenba ajanga US aser Iran tsüngta aitsütepa aliba mapang tesendaktep yangershitsü nükjidong nung Qatar ato kilonser-i Brehostibarnü Tehran semdangtsü.

Gulf nung Iran kidanger aser US tembar Qatar ya linük ana tsüngta yimjung asoshi jembitsür ka ama lia aru aser June ita mapang tatsüka rara anena ceasefire sangdongba nunga tongti shilem agia lir.

Rara tenzüker ita trok ajunger aser tangbo rara tuluba anener saka tangatettep kati maruteti lia Qatar PM-i Tehran semdanger alitsü. Strait of Hormuz azüoktsü asoshi linük ana ya rakteper, koba alima nung totzü abenba lenmang tongtipang ka lir aser Tehran-i kanga junga azüokteta lir.

Mejangjaba projectile kati strait nung tanker ka dak kongshia mi adok saka mapang tatsüka lir remseptet, ta United Kingdom Maritime Trade Operations agency ajanga Brehostibarnep ashi saka rong nung alirtem ajak kumzüka lir.

Iran aser Oman tsüngta tzü lenmang temesü nung mangatettep adokba mechi memorandum of understanding ya raksa, koba ajanga February 28 nü rara metenzükdang alima

nung totzü shilem 20 shi bena liasü.

Prangbong ola mangashir aser US mitkar indang Central Command-i ita ka jungnüa Iran dak amakba osang mali. Washington ya rongsenketzüng tsütsü ang tenük tali yoker ama ajiteter, aser parnoki Iran ya par trading partners nungi piladakja sanctions tali agütsütsü sentongtem ang sangdonger.

Hormuz ajanga totzü abenba tangsa tajemba kumogo aser Hombarnü iba tzü lenmang ajanga anogo nung totzü barrels 5 million abener, ta ashir. Rara metenzükdang strait ya ajanga anogoshi totzü tazü barrels 20 million bena liasü.

Iba tzü lenmang aser yangji revenue aruba lemsatsü asoshi Iran aser Oman angatettepogo, ta Iran indang Revolutionary Guards ajanga Bodhbarnü ashi, saka mapang tatsüka lir Iran nung 100, shirnok temeshi ainlen jajarterm

Rara tetenzüklen anünglen nungi bomb pokloksüba ajanga Iran mitkar tashi kanga ajemtsür liaka, Gulf nung US mitkar aliba kidanger linüktem amaksü aser strait nung totzü abenba rong tem nem timtem agütsütsü missile aser drone tashi lir.

UN indang International Maritime Organization ajanga ashiba agi, February 28 nü nungi tenzüka Strait of Hormuz nung

tatalokba 70 lir aser iba mapang tzüyim nung senzür 19 tepsetogo.

Ano nisung meyrirjang aika Iran aser Lebanon nung süogo, kechiaser US aser Israel nati Iran nem nuclear nok-nü meyangludaktsütsü, par sorkar laodaktsütsü aser Iran indang missile programme raksatsütsü nükjidong nung amak.

(Maneni tapak 8 nung...)

Ukraine rara tesashiba akumtsü akok

Kyiv, Luroi/August 27 (Agencies): Russia-i yasüng nungi tanep (Brehostibar) tashi Ukraine linük kübok tesem balala nung missiles aser drones khaloktsü aser Kyiv temeket nunga apokba osang liasü.

Russian Defence Ministry ajanga ashiba agi, Ukraine nung 100, shirnok temeshi ainlen jajarterm

Zaporizhzhia region nung nisung ka aser Kharkiv nunga nisung ka tepset aser nisung 14 yiru, ta Ukraine ketdangsür temi ashir.

Yimjung ken o jembiba nung tangatettep kati maruteti tembangba sülen Russia-i ano tesashiba amaksü asadangtar ta Kremlin den tesendaktep tajung aliba nüburtemi ashiba mapang ya ataloker. Moscow-i

Office of the
CHANGTONGYA SENSO TELONGJEM KOHIMA
Kohima, Nagaland

TENUNGSANG AGUTSUR

Asen **Changtongya Senso Telongjem Kohima (CSTK)** ajanga, Shri **Limasunep Jamir IPS, IGP-i 80th Independence Day 2026** anogo mung nung pa inyakba wadang nung alakteta inyakba **President's Medal for Meritorious Service** ngutetba atema konang nüngsang tulu bener arutsüba atema tenüngsang agütsür. Nü mapa nung maneni takokba lidakjangma ta moatsür aser nübur tenzüksü asoshi Tsüngremi na maneni moajang.

Sd/-
Aoyanger
President, CSTK

Sd/-
Imtishilu
General Secretary, CSTK

PUBLIC NOTICE

BEFORE THE COURT OF MEMBER MOTOR ACCIDENT CLAIMS TRIBUNAL, THANE AT. THANE

M.A.C.P. No. 255 / 2026
Exh No. 15

Dilshad Bi Mohsin Shaikh
g others Applicant

V/s

Kirtikumar Zinabhai Patel
g others Opponents

To,
Kirtikumar Zinabhai Patel
At- Project colony 20
Zunheboto, Nagaland - 798620

Whereas the above named applicant has filed accident Claims application for the compensation of Rs...1,00,00,000/-.....in the Tribunal against you and others.

You are hereby given notice to appear in the Tribunal in person or by pleaser duly instructed and to file your say within 30 days from the publication of this notice. Failing which the said application will be heard in your absence and determined ex-parte.

Give under my hand and seal on this day of

By Order
Superintendent
Motor Accident Claims Tribunal
Thane.

Clerk

Fenerbahce-i Lyon koka UEFA Champions League atema qualify süogo



Luroi/August 27, 2026

(Agencies): Bodhbarnü Champions League asaya nung Vedat Muriqi aser English defender Archie Brown nati goal kaka idaktsüba sülen Fenerbahce-i Lyon koka league phase atema qualify süogo.

Hopta ka tejakdang Istanbul nung mezüngbuba leg asaya goal 1-1 agütsür tembangba sülen France nung tanabuba league asaya ya Turkey team yagi goal 2-0 agi kokogo.

Kasa mapang nung Hungary nung asayar Barnabas Varga-i goal ana aser taoba mapang Real Madrid forward Luka Jovic-i goal ka idaktsüba sülen AEK Athens-i goal 4-0 agi Levski Sofia koka Champions League league

phase-i iogo.

Asaya nung Romania nung asayar Razvan Marin-ia goal ka idakja liasü. Team ana tsüingda mezüngbuba leg bo goal 1-1 dang agütsür liasü.

Viking Stavanger-ia asaya mekoki aliba nungi meyipa tur Dinamo Zagreb 3-1 agi koka parnoki aggregate nung goal 5-3 agi takok nguogo.

Parnok tang mezüngbuba Champions League group phase asayatsü lir.

Albania nung asayar Arber Hoxha-i Dinamo atema mezüngbuba goal idaktsü, saka minute ishika dang lir Zlatko Tripic-i penalty ka ajanga Viking atema goal ka idakja goal kasasa aküm.

Asaya tanabuba shilem

nung minute ana tsüingda Edvin Austbo aser Tobias Moi nati goal kaka idaktsüba sülen Viking pur qualify süogo.

Maneni Slovan Bratislava pura Champions League group phase atema tang agi tanabenbuba qualify süogo. Asaya nung mapang apuloktsü asayaba mapang Panama nung asayar Cristian Martinez-i goal ka idakja parnoki asaya akok.

Ano Celje nung Slovaksians aser Slovenians na asaya nung Andraz Sporar-i Slovaksians atema goal ka idaktsü saka Svit Seslar-i iba goal ya küptoka liasü. Iba sülen Martinez-i Slovenians atema tanabuba goal idakja parnoki asaya ya aggregate nung 3-2 agi kokogo.

Williams adinau nem US Open atema Wild Card agütsüogo

Luroi/August 27, 2026

(Agencies): US Open ayongertemi wildcard ka agütsüba sülen Venus aser Serena Williams na 2026 US Open tetsür tarep asayatsü.

Serena Williams' Arthur Ashe stadium-i meyipa arua asaya-a Carlos Alcaraz den külemi tarep temeyoktep asayaba sülen US Tennis Association-i iba osang ya sangdonga liasü. Alcaraz tenati mezüngbuba asayabo akok, saka quarterfinals nung tsükatok.

Venus Williams nem tetsür kija asaya nung asayatsü atema USTA wildcard ka agütsüogo, saka Serena bo kija asaya nung

shilem magitsü.

Tena senteper tetsür Grand Slam tarep asaya 14 koka lir, kong US Open ana densema lir. Tenatisa Olympics nung tetsür tarep asaya nung gold medal asem ngur lir.

Tena tatema New York nung 2022 küm külemi asayaogo. Iba küm tena mezüngbuba round nung Lucie Hradecka aser Linda Noskova nati tsükdaksü.

Maneni tena taküm Wimbledon nung asayatsü atema züngoksem, saka Serena kija asaya mezüngbuba round nung yiruba sülen masayatet.

Kasa asayamung tebur kija

asaya nung Stan Wawrinka nema asayamung ayongertemi Bodhbarnü wildcard ka agütsüogo.

US Tennis Association-i, Grand Slam kija asaya asem koker alisang Wawrinka yagi Patrick Kypson melentsü ta shiogo. Kypson nem wildcard agütsü, saka pa yiruba ajanga masayatettsüsa aküm.

Arishi küm 41 tain Wawrinka ya taküm küm tembangba sülen tennis asaya nungi anisüngzüksü. Pa taküm Australian Open, French Open aser Wimbledon ta Grand Slam asemprongla nung asayaogo aser tang GS tatembangbuba atema wild card nguogo.

DDFA League den Late Hejeto Ayemi Memorial Trophy ayonger

Dimapur, Luroi/August 27 (TYO): Küm ishika masayaba sülen Dimapur District Football Association (DDFA) League den Late Hejeto Ayemi Memorial Trophy September 15 nungi October 5 tashi league cum knock basis nung asayatsü.

Brehostibarnü Dimapur nung osangbenertem den sensaksemba mapang DDFA tir Mughato Aye-i, Dimapur nung football asayartem nem sabang tajung ka agütsütsü atema iba asayamung ya küm 15 MLA aser Advisor H. Tovihoto Ayemi tebur Late Hejeto Ayemi'er kinungertemi sponsor asütsü, ta metetdaksü. Paisa, iba asayamung ya takok ngua asayatetra ano küm 10 nungi 15 bo sponsor asütsü ta MLA-i tenangzükbä agütsüogo, ta ashi.

Iba asayamung nung team ti dang asayatsü aser shirnok tama züngoksemdir parnok nem tama maongka agütsütsü. League ya league basis nung asayatsü aser team pezü championship atema qualify asütsü. Taruba kümbo asayamung metenzük tsüingda ita ana jelia mesüra tajemtiba agi anogo 45 liabosa osang agütsütsü, ta tir-isa metetdaksü.

Mughato-i ashiba agi, Dimapur ya Nalaland nung football asayar aika anitetba tesem rongnung ka lir. Santosh

Trophy aser junior aser sub-junior category nung Nagaland state team nungi asayaba asayartem ya timba Dimapur nungi dang asür, ta pai shisem.

Dimapur League ya mapang talangka asaya arudar. Tanga district nung league tem ayongzüka masayaba mapang Dimapur nungbo asaya liasü. Saka küm tem tsüingda iba asayamung ya teti dangbo ayongzüka masayateti arudar, ta pai ashi.

Sorkari district shia nem Astro turf ground kakabo agütsütsü ta shiogo aser Kohima nung mezüngbuba astro turf ground ka yangluogo. State nung saisapong lokti tenteti ajaki Dimapur nung tanabuba ground ya yanglutsü ta meteter liasü. Ajisiüaka tanü tashi sorkari Dimapur nem Astro turf ground ka danga agüja mali.

Association-i MLA tem dang, Dimapur nema astro turf ka danga agütsütsü asoshi mepishitsütsü takhangba ka agütsüogo. Football asayaba lokti iba asoshi yongya seta atadar, ajita asünung dang Dimapur ya football asaya atema tanaben powerhouse ka kümtettsü aser Nagaland asoshi asayar tajungtem anitettettsü, ta kasa sangdong ajangasa metetdaksü.

Karolina aser Jakub nati US Open tarep temeyoktep asaya kokogo

Luroi/August 27, 2026

(Agencies): Czech nung tarep Karolina Muchova aser Jakub Mensik nati US Open tarep temeyoktep asaya final nung Switzerland tsür Belinda Bencic aser Italy nung Flavio Cobolli na koka team ka ama tang mezüngbuba Grand Slam titlen ka benogo.

Final asaya nung Karolina aser Jakub nati 6-3, 1-6, 10-6 agi Bencic aser Cobolli na koka liasü.

Bodhbarnü Arthur Ashe Stadium nung Muchova aser Mensik nati kanga junga asaya tenzük aser mezüngbuba set ya minute 30 majung tsüingda koka liasü. Set point nung aliba mapang Mensik-i Bencic adena ace ka zükloksüba sülen tenati asaya akok.

Tanabuba set nung Bencic-i ball ka kanga junga züklokja winner ka anguba sülen serve break sür tena 3-1 agi tejakdang aküm aser iba sülen tenati asaya kokatok.

Deciding nung 10-point match tiebreak asayaba mapang Mensik-i service kanga ajanga aoba den net nung kanga junga asayaba ajanga Czech

nung tarep yagi asaya aziüoka liasü.

Arishi küm 20 tain asayar yagi volley tajung ka zükloksüba sülen tena 8-4 agi tejakdang aküm aser iba sülen Muchova-i iba asaya nung service tajungtiba oa championship points angu.

Iba sülen Mensik-i maneni ace ka oa tenati asaya koka, team ka ama tenati mezüngbuba Grand Slam title ka benogo.

Muchova aser Mensik nati semifinal asaya nung match points ana tashi kümzükbä sülen Russia nung tarep Mirra Andreeva aser Andrey Rublev na koka liasü.

"Ni taonung idaki nokdaksü ta imla maliasü. Küna jangradema asayatsü atema dang aru saka tang idaki nokdaka lir. Anungji küinati langa shitak inyaker alitsü ta bilemer," ta Muchova-i ashi. Laisa Bencic aser Cobolli na nem tenüngsang agüja liasü.

Taküm iba asayamung nung nüngutgu asayartem aika asayaogo, kong Novak Djokovic, Aryna Sabalenka, Carlos Alcaraz aser Serena Williams nung densema liasü.

BENDANGLI OSANG :

Tapak 7 nungi...

Qatar PM-i yimjung bushia Tehran...

Qatari Ato Kilonser Sheikh Mohammed bin Abdulrahman al-Thani-i Brehostibarnü Tehran semdangba mapang Qatar maneni tetsüngtai ia jembishinütsü merangtsü aser region nung tanga terenlok indang jembitsü, ta Iranian Foreign Ministry odongtar Esmaeil Baghaei-i ashi.

Qatar indang Foreign Ministry odongtari x nung ashiba agi, Sheikh Mohammed-i Strait of Hormuz nung 'freedom of navigation' aser February 28 masüidang aliba status quo dangi meyiptsü nüngdakba indanga jembitsü aser tensa tajungba kumdakja jembishinü katettsü indanga Iran ketdangsürtem den jembitsü.

Rara metenzükdang iba international waterway nungya talenba kecha makai rong tem senzüa liasü, saka rara tenzüker Iran-i iba strait ya amokbangogo aser revenue source ka ama kumdakja iba tesem ajanga senzüba rong tem dang commission meshir, koba US-i memulunger.

"Oman den Strait of Hormuz mechi agreement ka ano metembangir lir aser iba atema maneni jembishinü akar," ta Iranian source ka ajanga ashi.

Ibaji Islamic Revolutionary Guard Corps indang odongtar Brigadier General Hossein Mohebbi-i sangdongba den meputeper, shibai linük anaprongi agizüktettsüsa strait aziüoktsü aser yangji revenue atema Iran

aser Oman tangatettep kati arua renemogo ta ashi.

June ita interim ceasefire mesüra memorandum of understanding zülutepba kübok Tehran-i akhangba ama US-i meinyak tashi strait shibanga alitsü, ta Mohebbi-i ashi.

Tehran-i akhangba nungya US-i Iran nung rongnendak tesemtem mokdanga aliba tembangtsü, compensation agütsütsü aser sanctions agentsü dena lir.

Strait ajanga rong tem senzüba aziüoktsü atema Iran aser Oman ya hopta ishika jembishinüa arur. Tehran aser Washington nati iba channel ya amokbangtsü meranga arua pei sasa tenokdangba balala agüja aru.

BILEMDANGANG

"Tenüng tajungji senti mozüidang nungi taoba."